

## Munir Alić, inženjer geodezije



Nakon kraće bolesti, 17.09.2020. godine preminuo je u Sarajevu naš uvaženi kolega Munir Alić, ing. geodezije. Dženaza je obavljena u prisustvu velikog broja rodbine, prijatelja, komšija, kolega i drugih poštovalaca, a ukopan je na mjesnom greblju Kuta u njegovoj rodnoj Misoči.

Munir Alić rođen je 08.05.1951.godine u Misoči, općina Ilijaš. Osnovnu i srednju školu završio je u Ilijašu. Višu geodetsku školu završio u Sarajevu 1975. godine i stekao zvanje inženjer geodezije.

Radni odnos zasnovao je u Geodetskom zavodu u Sarajevu gdje je radio sve do 1992. godine, odnosno do početka ratnih dešavanja u našoj domovini. U razdoblju od 1991. do 1998. godine bio je politički aktivan obavljajući različite dužnosti, a zapažena je i njegova uloga u 126. Ilijaškoj brigadi Armije Republike Bosne i Hercegovine tokom ratnih zbivanja. U poslijeratnom periodu aktivno je učestvovao u svim sferama društvenog i kulturnog života u Ilijašu, što se naročito odnosi na boračko udruženje "Patriotska liga". Dobitnik je Plakete za sveukupni doprinos u odbrani Bosne i Hercegovine kao organizator i pokretač otpora.

Reintegracijom općine Ilijaš, 1996. godine, Munir je imenovan za direktora općinske uprave za geodetske i imovinsko pravne poslove. Godine 2000. raspoređen je na poslove šefa katastra gdje je i radio do kraja svog radnog vijeka.

Munir je bio čovjek koji je sve aktivnosti obavljao savjesno i sa mnogo volje i razumijevanja, bilo da se radi o stručnim geodetskim poslovima ili poslovima vezanim za ostale aktivnosti. Njegov odnos u druženju sa kolegama i prijateljima je jednostavno nezamjenjiv.

Posebno treba naglasiti Munirov skladan porodični život. Kao najstariji sin u porodici, koja je rano ostala bez oca, sa svojom majkom Saimom vodio je ugledno domaćinstvo. Oženio se prelijepom Zilhom i sa njom, uz zajedničko zalaganje i odricanje, odgojio dvoje prekrasne djece, sina Mirzu i kćerku Lejlu kojima je omogućio najveće obrazovanje i koji se kao takvi dokazuju u svojim strukama kao izuzetno uspješni.

Teško je odabrati riječi kojim bi se opisao rastanak od prijatelja i saradnika. Kolegama sa kojima je godinama radio, bilo da je bio nadređeni ili saradnik, njegov odlazak je odlazak nekog najrođenijeg, najbližeg. Uvijek je doživljavan kao dio porodice, a ne kao dio poslovnog okruženja.

Naš dragi Munir uživao je poštovanje zbog svoje stručnosti i radinosti, prijateljskog odnosa i otvorenosti. Zbog tih osobina uspomena na njega biti će sačuvana u našim mislima i našim srcima.

Izgubili smo jednog dobrog i čestitog čovjeka.

Hvala mu za sve što je učinio.

*Nizama Mališević*